

# *Nuwe Lied Bediening*

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: [kontak@nuwelied.info](mailto:kontak@nuwelied.info)

Webwerf: <http://www.nuwelied.info>

## **DIE NAGESLAG VAN ABRAHAM**

Is jy die nageslag van Abraham? Is dit wat jy glo en hoe jy jouself sien? Indien jy "ja" hierop antwoord, beteken dit jy beskou jouself as deel van Israel. Sou jy "nee" hierop antwoord, dan kan jy nie die nageslag van Abraham wees nie! Ons leef in 'n tyd waar elkeen hierdie saak vir homself sal moet uitmaak en moet verstaan wat die antwoord en die implikasie daarvan beteken.

Paulus skryf in Gal. 3:7 en 29 die volgende:

*Julle verstaan dan dat die wat uit die geloof is, hulle is kinders van Abraham.*

*En as julle aan Messias behoort, dan is julle die nageslag van Abraham en volgens die belofte erfgename.*

Op grond van ons geloof in Yeshua Messias is ons dus kinders van Abraham, naamlik sy nageslag en dus ook sy erfgenaam. Abraham is die vader van almal wat in Yeshua as die Messias glo (Rom.4:14 tot 16). Hy is ook die aardsvader van die onbesnedene (Rom. 4:11). Ons is die kinders van Abraham uitsluitlik op grond van die genade van YHVH deur geloof in Yeshua. Hierdie belofte staan vas vir die hele nageslag, naamlik vir Jood en nie-Jood (Rom. 4:16). Elkeen wat uit die geloof is, word saam met Abraham geseën (Gal. 3:9). Om die nageslag (kinders) van Abraham te wees is dus nie op grond van verdienste nie; ook nie deur die wet (die Torah) te onderhou of op enige ander wyse nie. Dit is alleenlik deur geloof!

Dit is geloof wat ons die nageslag van Abraham maak. Abraham is deur geloof geregverdig verklaar (Gen. 15:6; Rom. 4:9) en dit is alleenlik deur geloof wat ons geregverdig verklaar word. Geloof is dus die gemeenskaplike faktor van ons familie verbintenis met Abraham.

Abraham is die begin (die aardse vader) van YHVH se volk wat Hy as Sy eiendom geneem het (Ex. 19:5 en 6; 1 Pet.2:9). *Daarom is daar ook gebore uit een vader, en dit 'n verstorwene, kinders soos sterre van die hemel in menigte en soos die sand aan die strand van die see, wat ontelbaar is* (Heb. 11:12). Elke gelowige in Yeshua word deel van YHVH se volk, naamlik Israel,

wat met Abraham as vader begin het. Daar is nie meer 'n onderskeid tussen Jood of Griek nie of tussen slaaf of vryman nie of tussen man en vrou nie, want ons is almal een in Yeshua Messias (Gal. 3:28). Ons is almal die kinders van Abraham wat deur geloof in Yeshua Messias die kinders van YHVH, ons Hemelse Vader, geword het.

Baie wat met bogenoemde verklaring saamstem en glo dat alle gelowiges die kinders van Abraham is, glo egter dat die Shabbat, die feestye van YHVH, die voedselvoorskrifte, ensovoorts net vir die Jode bedoel is. Hierdie siening word selfs vanaf kansels verkondig! Die vraag ontstaan dan: Watter Jode? Is dit net die wat Yeshua as Messias verwerp het wat byvoorbeeld die Shabbat, feestye en voedselvoorskrifte steeds moet hou? Wat van die Jood wat Yeshua as Messias aanneem? Moet hy afstand doen van die wet (die Torah) en hom as vry daarvan beskou soos die algemene siening van die Kerk is? Indien laasgenoemde waar is, beteken dit dat 'n Jood inderwaarheid sy verbintenis met Israel en die voorvaders van Israel moet verbreek om deel van die Kerk te word.

Die werklike vraag is dus die volgende: Wie moet by wie aanpas? Ons kan die vraag ook anders stel, naamlik: Wie is op wie ingeënt en wie voed wie? Die antwoord word baie duidelik deur Paulus in Romeine 11 gegee. Hy begin deur in vers 1 die volgende vraag te vra en dan die antwoord te gee:

*Ek vra dan: Het God miskien sy volk verstoot? Nee, stellig nie! Want ek is ook 'n Israeliet uit die nageslag van Abraham, van die stam van Benjamin. God het sy volk wat Hy vantevore geken het, nie verstoot nie.*

Dan verduidelik Paulus verder dat die ekklesia of uitgeroepenes (die 'kerk'), die wilde olyftak is wat op die mak olyfboom ingeënt is. Dit is ons wat deur geloof in Yeshua Messias ingeënt word op die mak olyfboom. Dit is ons wat moet terugkeer na die vettigheid van die voedingsbron van die lewende Torah, naamlik Yeshua Messias en wat gevoed word deur die vettigheid van die wortel naamlik YHVH self. Yeshua is die Woord wat van die begin af by YHVH was en wat YHVH is (Joh. 1:1 en 2). Dit is hierdie bron wat ons voorvaders Abraham, Isak en Jakob gevoed het. Dit is hierdie bron wat hulle van Yeshua geleer het (Joh. 5:46) en dit is ons wat deel daaraan gekry het. Daarom het elke gelowige in Yeshua 'n Hebreuse verbintenis wat in Torah gegrondves is. Dit is waaraan Abraham en sy nageslag deel het. Ons het op die wyse deel van Israel geword en deel van YHVH se plan.

*En as sommige van die takke afgebreek is, en jy wat 'n wilde olyfboom was, onder hulle ingeënt is en deel gekry het aan die wortel en die vettigheid van die olyfboom, moet dan nie teen die takke roem nie; en as jy roem dit is nie jy wat die wortel dra nie, maar die wortel vir jou. Jy sal dan sê: Die takke is afgebreek, sodat ek ingeënt kon word. Goed! Deur ongeloof is hulle afgebreek, maar jy staan deur die geloof. Moenie hoogmoedig wees nie, maar vrees. Want as God die natuurlike takke nie gespaar het nie, sal Hy miskien jou ook nie spaar nie. Rom.11:17 tot 21*

Hoewel baie met bogenoemde sal saamstem, verstaan hulle dit nie werklik nie. Geen wonder dat sommige getroue Torah-gehoorsame Jode sê dat die 'Jesus' van die Kerk verskil met Yeshua van Torah. In die lig hiervan, en weens die vervolging wat Jode aan die hand van Christene gely het, is dit te verstane dat Jode skepties teenoor die Kerk en Christene in die algemeen staan. Dit is tyd dat Christene moet besef en verstaan dat hulle die nageslag van Abraham, Isak en Jakob is. Dit is ons wat deur YHVH se genade deel gekry het aan die seëninge van Abraham. Ons aardsvader is deur geloof geregverdig verklaar en is deur gehoorsaamheid aan YHVH oorvloedig geseën.

*En Ek sal jou nageslag vermeerder soos die sterre van die hemel en aan jou nageslag al hierdie lande gee, en in jou nageslag sal al die nasies van die aarde geseën word; omdat Abraham na my stem geluister en my ordening, my geboorte, my insettinge en my wette onderhou het.*  
Gen. 26:4 en 5

Abraham is die vader van geloof en gehoorsaamheid. Dit is sy voorbeeld wat ons moet volg. Ons kan onself nie hiervan losmaak nie, want dan distansieër ons onself van die basis van ons geloof en ontferm ons onself.

Graag verduidelik ek dit soos volg. Ons het 'n dogter wat op ses maande ouderdom deel van ons gesin deur pleegsorg en later deur wettige aanneming geword het. Volgens hofbevel is haar oorspronklike geboorte sertifikaat vernietig en 'n nuwe een met haar nuwe naam en van was uitgereik. Hiervolgens is dit asof sy ons eie vlees en bloed is. Sy is in alle opsigte soos ons eie kinders tot die mate dat mense selfs sê sy lyk soos ons. As kind moes sy, soos ons eie twee seuns, in alle opsigte gehoorsaam wees aan ons onderrig en instruksies (ons "wette"). Al drie was kinders in ons huis en dieselfde huisreëls het vir al drie gegeld. Ons aangenome dogter kon nie sê dat sy nie in alles gehoorsaam hoef te wees nie omrede sy nie ons vlees en bloed is nie. Nee, ons is haar wettige ouers en sy is ons wettige kind en daar is geen onderskeid tussen haar en die kinders van ons eie vlees en bloed nie. Sou sy 'n siening en houding neem dat sy nie gehoorsaam hoef te wees op grond van bloedlyn, dan sou sy haarself nie as deel van ons gesin beskou nie. Sy sou nie al die seëninge van gehoorsaamheid kon ervaar nie, want ons sou haar moes tugtig.

Deur geloof in Yeshua as Messias word ons "oorspronklike geboorte sertifikaat" nietig verklaar en word 'n nuwe een deur die hemelse hof uitgereik. Hiervolgens is ons die nageslag van Abraham en het ons deel gekry aan YHVH se volk en aan die belofte van die beloofde land, Israel. Ons is deel van YHVH se 'huishouding' en dieselfde onderrig en instruksies geld vir beide die biologiese kinders en die 'aangenome' kinders!!

Ons moet altyd onthou dat ons Vader het 'n plan van herstel en versoening. Hierdie plan begin by Israel en sal by Israel eindig. Ons as gelowiges in

Yeshua Messias is slegs deel van die plan op grond van God die Vader se genade. Hy maak ons deel hiervan soos bevestig word dat ons deur geloof in Yeshua as Messias die nageslag van Abraham is.

In die land Israel, en deur Israel (albei huise, naamlik Juda en Efraim) sal YHVH Sy ewigheidsplan voltooi, want dit is hier waar Yeshua Messias weer sal verskyn as die Koning van alle konings.

*Die Magtige God van die gode, יהוה, het gepraat en die aarde geroep, van die opkoms van die son af, totdat hy ondergaan. Vanuit Tziyon, die volmaaktheid van skoonheid, het God geskyn. Ons God sal kom en sal nie stilbly nie. Vuur sal voor Hom uit verteer en die vuur sal hewig rondom Hom brand. Hy sal roep na die hemel daarbo en na die aarde, om Sy volk te oordeel: Kom by Hom bymekaar, getroues, hulle wat 'n verbond met Hom gesluit het deur 'n offer en die hemele sal Sy Onpartydigheid en Opregtheid verkondig, want God self is die Regter! "Luister, My volk en Ek sal met julle praat; Yisra'el, Ek sal teenoor jou getuig: Ek is God, jou God!*

Ps. 50:1 tot 7 (PWL Vertaling).

Is jou lewe 'n getuienis van die nageslag van Abraham en gehoorsaamheid aan YHVH se onderrig en instruksies? Is jou redding deur geloof die motivering vir gehoorsaamheid aan Vader se onderrig en instruksies, Sy Torah?

Voel jy werklik deel van Israel, veral in hierdie krisisuur wat hulle beleef?

Ondersoek jou hart en maak die saak met jouself uit. Jy is of die nageslag van Abraham of nie! Jy is of deel van Israel of nie! Jy is of ingeplant op die mak olyfboom of nie! Jy kan nie iets anders wees nie.

Om deel van Israel te wees kom teen 'n prys, maar om nie deel van Israel te wees nie kom met ernstige nagevolge!! Die prys wat elkeen sal moet betaal wat Yeshua as Messias bely, en wat Torah-gehoorsaam leef, is vervolging soortgelyk as wat Israel verduur het en steeds verduur. Maar om nie deel van die nageslag van Abraham, en dus deel van Israel, te wees nie beteken om nie deel van YHVH se volk te wees nie.

Deur geloof in Yeshua en gehoorsaamheid aan Torah ontvang ons burgerskap van Israel.

*Daarom, onthou dat julle wat vroeër heidene in die vlees was en onbesnedenes genoem word deur die sogenaamde besnydenis wat in die vlees met hande verrig word, dat julle in daardie tyd sonder die Messias was, vervreemd van die burgerskap van Yiesraél en vreemdelinge met betrekking tot die verbonde van die belofte, sonder hoop en sonder Elohiem in die wêreld. Maar nou in die Messias Yahshua het julle wat vroeër ver was, naby gekom deur die bloed van die Messias. Want Hy is ons vrede, Hy wat albei*

*een gemaak en die middelmuur van skeiding afgebreek het... Ef. 2:11 tot 14  
(Woord en Getuienis)*

*Ontvang YHVH se Woord met welwillendheid, maar ondersoek self die Skrifte  
of hierdie dinge die waarheid is (Hand. 17:11).*

Shalomgroete.  
Johan

**E-pos:** [kontak@nuwelielied.info](mailto:kontak@nuwelielied.info)

**Webwerf:** <http://www.nuwelielied.info>

*Kopieë mag gemaak en gratis versprei word, maar mag nie verkoop word  
nie. Geen veranderinge mag aan die oorspronklike teks aangebring word en  
dit dan onder die naam van Nuwe Lied Bediening versprei nie.*

GB3.09NageslagAbraham